

## 16-bob. Erkin bojxona zonasi

### 106-modda. Erkin bojxona zonasi bojxona rejimi

Erkin bojxona zonasi bojxona rejimi shunday rejimki, bunda tovar muayyan joylar va hududlarda bojxona to'lovlari to'lanmagan hamda iqtisodiy siyosat choralari qo'llanilmagan holda joylashtiriladi va shu tarzda undan foydalaniladi.

### 107-modda. Tovarlarini erkin bojxona zonasi bojxona rejimiga joylashtirish talablari va shartlari

Erkin bojxona zonasi bojxona rejimiga har qanday tovar joylashtiriladi, bundan bojxona hududiga olib kirilishi taqiqlangan tovarlar hamda ushbu hududdan olib chiqilishi taqiqlangan O'zbekiston tovarlari mustasno.

Erkin bojxona zonasi faoliyat ko'rsatishini ta'minlash uchun zarur O'zbekiston tovarlariga nisbatan erkin bojxona zonasi bojxona rejimi qo'llanilmaydi.

Boshqa tovarlarga zarar yetkazishi mumkin bo'lgan yoki alohida sharoitlarda saqlash talab etiladigan tovarlar maxsus moslashtirilgan binolarda saqlanishi lozim.

### 108-modda. Tovarni erkin bojxona zonasi bojxona rejimiga joylashtirish uchun zarur bo'ladigan hujjatlar

Tovarni erkin bojxona zonasi bojxona rejimiga joylashtirish uchun deklarant bojxona organiga bojxona yuk deklaratsiyasini va tovarning kuzatuv hujjatlarini taqdim etadi.

Ruxsat etish xususiyatiga ega tegishli hujjatlar bo'lgan taqdirda erkin bojxona zonasi bojxona rejimiga joylashtiriladigan tovarga nisbatan bojxona organlarining axborot tizimida bunday hujjatlar mavjudligini bojxona organi mustaqil ravishda tekshiradi.

## 109-modda. Erkin bojxona zonasi bojxona rejimiga joylashtirilgan tovar bilan amalga oshiriladigan operatsiyalar

Erkin bojxona zonasi bojxona rejimiga joylashtirilgan tovar bilan operatsiyalar erkin iqtisodiy zonalar to'g'risidagi qonun hujjatlariga muvofiq amalga oshiriladi.

Erkin bojxona zonasi bojxona rejimiga joylashtirilgan tovar bilan chakana savdo operatsiyalarini amalga oshirishga yo'l qo'yilmaydi.

Erkin bojxona zonasi bojxona rejimiga joylashtirilgan tovar bilan ayrim operatsiyalarni amalga oshirishga qonun hujjatlariga muvofiq taqiqlar va cheklovlar belgilanishi mumkin.

## 110-modda. Tovarining erkin bojxona zonasi bojxona rejimida turishi muddatlari

Tovar erkin bojxona zonasi bojxona rejimida cheklanmagan muddatda turishi mumkin.

## 111-modda. Erkin bojxona zonasi bojxona rejimida bojxona to'lovlarining qo'llanilishi

Erkin bojxona zonasi bojxona rejimida bojxona to'lovlari ushbu Kodeksning [105-moddasi](#) talablari inobatga olingan holda, erkin iqtisodiy zonalar to'g'risidagi qonun hujjatlariga muvofiq undiriladi.

## 112-modda. Erkin bojxona zonasini tashkil etish

Erkin bojxona zonasi erkin iqtisodiy zonalar to'g'risidagi qonun hujjatlarida belgilanadigan tartibda tashkil etiladi.